

beri euadamus à periculo imminente. Quare Ethnicorum figmentis, nullius virtutis aut potentiae fidem nullam adhibeamus, in Deum eiusque verba omnia perficientia credamus, vt Deo commiserescendo bene in omnibus huiusmodi angustiis nobis sit atque fauste. Hinc loco antea citato in tempestatis marinae aggrauatione sic pergit Propheta: *Tunc clamant ad IEHOVAM, & de angustiis eorum educit eos, stare facit turbinem in silentium, & silent fluctus eorum, vnde celebrant IEHOVAE misericordiam, & mirabilia eius filiis hominum predicant, Psal. 107.*

Correlatiuum ad Microcosmum.

TAm ex Theosophorum quam Philosophorum eruditiorum doctrina accepimus, quatuor esse in mundo ad Archetypi & primae Ideae similitudinem procreata, quorum duo sunt naturali via, à creatore optimo maximo creata, videlicet mundus & homo, alia vero creaturae humanae hominis nempe artificio fabricata, Arca nempe seu tabernaculum fæderis à Mose exstructum, & templum illud insigne à Salomone fabricatum. Vt ergo naturalia illa sunt secundum Archetypi effigiem creata, ita quidem artificialia ad naturalium exemplum sunt fabricata. Sic enim in mundo tres habemus regiones, quarum vna dignitate alteri præcellit, videlicet suprema, quæ est omnium essentia præcellentissima, *Empyrea* dicta ab ignea sua natura, & vero, vt ignis est elementum omnibus cæteris dignitate eminentius, essentia purius & simplicius, itaque idem ob istam rationem cælum *Empyreum* est cæteris duobus inferioribus caput atque Princeps, vnde pro sede assignatur creaturis omnium purissimis atque simplicissimis, Angelis videlicet, atque intelligentiis splendore diuino coruscantibus.

Tunc media regio de vtroque extremo participans sequitur, quæ *Aether* dicitur, quia ex igne supremo & aere infimo videtur componi, quare non est adeo pura atque illa suprema, nec ita impura, crassa, atque immunda, ac illa infima, sed in mediocritate consistens. Denique infima est superioribus quantitate crassior, qualitate imperfectior, omnibusque mutationibus obnoxia, videlicet ventorum agitationi, nubium procreationi, tonitruorum vociferationi, atque fulgurum, presterum, & cæterorum meteororum lucidorum inflammationi, pluuiarum madefactioni, aquarum inundationi, ventorum è terra erumpentium violentiæ insanæ & furibundæ, turbinum potentiae, & infinitis aliis præter naturæ placidæ leges accidentibus; Porro etiam in homine ad imaginem mundi fabricato (vnde & Mundi filius dicitur à Mercur. Trismegisto) habemus cælum intellectuale, menti diuinæ eiusque scintillis angelicis assignatum, vnde & eius caput est, sancti sanctorum sedes; in regione media seu spiritu cælesti est vitæ atque animæ viuientis sedes, atque aer eius grossus, cum externa templi huiusce humani sedes, videlicet corpus, tot & tantis mutationibus subiiciatur, atque meteororum, tam ad generationem quam corruptionem tandem effectibus, vt quam aptissime infimæ mundi regioni comparari debeat.

At vero hoc idem confirmauerunt Moyses in sui tabernaculi, & Salomon in sui templi constructione: Nam prima eorum pars est detecta, & aeri communi aperto relicta, ventis, pluuiis, grandinibus, niui, & aliis aeris impressionibus, quæ sub circulo lunari formari obseruantur, ac denique omnibus alterationibus & mutationibus subiecta est, quare & huic parti accedunt homines vulgares omnis generis, simul atque animalia, vbi ratione sacrificiorum continuorum assidua est vitæ & mortis vicissitudo; vnde factum est, vt mundi elementaris dispositioni conuenienter applicetur pars illa, vt pote qui compositus est ex aqua, tanquam substantia fluxili & instabili, vnde mundus reuera dicitur tenebrarum atque obscuritatis, atque ob hanc causam tentator dicitur quandoque Princeps tenebrarum, & quandoque Princeps mundi, & quandoque Princeps habens potestatem aeris. Pars secunda tabernaculi seu templi tecta est, atque intrinsecus auro resplendet, & illuminatur candelabro cum 7. brachiis, quæ sine dubio denotant planetas totidem, vnde hæc tabernaculi regio sine dubio repræsentat mundum in Macrocosmo cælestem, de luce & tenebris participantem, videlicet igne & aqua tenui, vnde dicti sunt cæli ab Hebræis *Eshamaim* ab *Esh*, igne, & *maim*, aqua, ex quibus liquet, quod cæli substantia sit reuera corpus, sed incorruptibile, quodam imbutum intellectu, à quo gubernatur, eique annectitur, ita vt non sit materia hæc libera nec vagabunda, talem etiam respectum habet anima rationalis in homine, seu Microcosmo, ad eius corpus. Tertia Tabernaculi seu Templi pars erat Sanctum Sanctorum, effigiem seu imaginem præseferens mundi intellectualis, qui est ignea angelorum atque intelligentiarum abstractarum seu separatarum (qui ministri sunt Dei viuientis) sedes & domicilium, quod etiam in eo significatur, quoniam duo Cherubini aurei extensis in longum alis tegunt & adumbrant propitiatorium. Porro etiam in templo humano has omnes habemus regiones, puritate & impuritate omnimodo differentes, vnde factum est, quod vt in mundo maiori omnes habemus influxus à DEO per mundum maxime purum atque igneum, in illum sibi proxime subiacentem, videlicet mediantibus sephirotis per regionem angelicam seu empyream in illam ætheream, atque itidem illa ætherea in illam sublunarem, elementarem dictam